

მეუფე პეტრე ე.წ. ციანიდის საქმესთან დაკავშირებით საპარლამენტო კომისიის შექმნას ითხოვს



ჭყონდიდის ყოფილი მიტროპოლიტი, მეუფე პეტრე ცაავა ე.წ. ციანიდის საქმესთან დაკავშირებით საპარლამენტო კომისიის შექმნას ითხოვს.

როგორც „ინტერპრესნიუსს“ მეუფე პეტრემ განუცხადა, საზოგადოებამ უნდა გაიგოს, ხელისუფლებამ და საეკლესიო ხელისუფლებამ ერთობლივი ძალებით როგორ დაგეგმა „ციანიდის საქმე“.

„ვინაიდან 2018 წლის სხდომაზე წმინდა სინოდმა მიიღო გადაწყვეტილება, რომ სამი ინსტანციის გავლის შემდეგ შექმნიდა შიდა კომისიას, რომელიც შეისწავლიდა ამ საქმეს, ნათელს მოჰფენდა ბევრ პასუხგაუცემელ შეკითხვას და საპატრიარქო თავს იკავებს, ემალება ამ განჩინების აღსრულებას, მიმანია, რომ მაღალი საზოგადოებრივი ინტერესიდან გამომდინარე, იმდენად ბევრი დარღვევა მოხდა, იმდენად ბურუსითაა მოცული და ანტიქრისტიანულ და ბოროტ სცენარს ჰქონდა ადგილი „ციანიდის საქმის“ დაგეგმვის დროს, რომ საზოგადოებამ უნდა იცოდეს, ერში თუ ბერში, ხელისუფლებასა თუ საეკლესიო ხელისუფლებაში როგორი ერთობლივი ბოროტმოქმედებით დაიგეგმა „ციანიდის საქმე“. აუცილებლად უნდა ჩამოვხსნათ

ფარდა და ნათელი მოვფინოთ „ციანიდის საქმეს“ პირველი დღიდან-დღემდე მიმდინარე მოვლენებს“, – განაცხადა მეუფე პეტრემ.

ჭყონდიდის ყოფილი მიტროპოლიტი დეკანოზ გიორგი მამალაძის შეწყალებასთან დაკავშირებით საპატრიარქოს საზოგადოებასთან ურთიერთობის სამსახურის ხელმძღვანელის, დეკანოზ ანდრია ჯალმაიძის დღევანდელ განცხადებასაც გამოეხმაურა, რომელმაც განაცხადა, რომ საპატრიარქოს მხოლოდ შუამდგომლობის დაყენების ფორმატი აქვს. მეუფე პეტრეს თქმით, ეს განცხადება უპასუხისმგებლოა.

„ეს არის სრული უპასუხისმგებლობა და დაბრუნება პილატეს მიერ ქრისტეს სასამართლოზე ხელის დაბანისა, მცდელობა ყოველ შემთხვევაში. საპატრიარქოს კეთილი ნების შემთხვევაში, ვინაიდან წმინდა სინოდის გადაწყვეტილების მთავარი მოტივაცია, რომ ეშუამდგომლა, იყო მამაოს მძიმე ავადმყოფობა, საპატრიარქოს შეეძლო, ალტერნატიული შუამდგომლობა გაეწია იმ სამინისტროსთვის, რომელსაც კანონი ავალდებულებს და აძლევს უფლებას, რომ გადავადების სახით, სამკურნალოდ გამოეშვან პატიმარი. საპატრიარქო ვინაიდან ამას არ აკეთებს, უკვე არ არის გულწრფელი“, – აღნიშნა ჭყონდიდის ყოფილმა მიტროპოლიტმა.

კითხვაზე, აპირებს თუ არა პატიმრობაში მყოფი დეკანოზის მონახულებას, მეუფე პეტრე ასე პასუხობს: „მე დღემდე თავი შევიკავე მონახულებისგან, რომ რაღაც არ გამხდარიყო მისი შეწყალების მიმართ შემაფერხებელი გარემოება, ამიტომ არ მომიტხოვია და შემდგომში ვნახოთ“.